

小倉山房詩集

小倉山房詩集卷五

丙寅至戊辰

錢唐袁枚子才

春柳

已讓梅花一著先尚傳芳訊早春天驟開青眼如相識
拋得黃金使少年十里遠遮江店小半生閒抱酒旗眠
東皇有意相憐惜莫使橫陳大道邊

牽雲曳雪滿關河如此纓綿奈客何學舞幾時才長大
倚闌終日作嬌波春闌離恨風前遠故國斜陽笛裏多
自笑青袍人照舊那堪重唱叛兒歌

靈和殿裏舊心情移種江南百感生腰折難禁春雨重
花高易惹晚風驚也知上苑長離別不管何人且送迎

聽說輕狂聽惱懶亂梳頭髮過清明
裊裊驚黃帖地柔鞦韆扶影出墻頭受風身比羣花活
照水眉生滿鏡愁古渡有誰嘶白馬酒家無處不青樓
千條萬緒情難盡舞到黃昏尚未休

秦淮小集座有歌郎上元許令目憫之郎亟引去
余迂許憐郎而調以謔

五月蟠桃花事新衆仙同日咏宜春傳呼驚聽劉安到
口斥嫦娥避寡人

金燈紅照柳千行風勁珠簾烏忽翔惆悵秦淮花兩岸
南河春色北河霜

秦淮禳詩

春愁原屬杜司勳
况復繁華領白門
六代雲山一河水
爭禁人到不消魂

金縷飄殘玉樹終
流珠人去采雲空
只留幾點漁陽鼓
打出燈船面面紅

放衙時節蔣山青
看捲紅旗出訟庭
傳語前鸞莫呵殿
沿河方愛管絃聽

無緣打槳送春潮
有意攀帷認板橋
深夜風停街柝靜
隔牆還有一枝簫

楊枝婀娜竹枝柔
百轉流鶯唱未休
高寫零丁招客賞
清商幾部屬蘇州

春風無力酒旗低
十幅湘簾一剪齊
遮莫游魚吹雪上

琵琶聲急水亭西

家家脂粉墜殘紅無數眉痕學遠峯水爲情多流不去
秋來處處長夫容

丁福王元態各清康郎風調更橫生使君便是羣芳譜
能與凡花辨小名

鴈師霍霍意氣羅諸王啞啞白頸烏前船丹珠歌小海
後船青溪載小姑

籠袖騎民隊隊過茶坊到處喚斯波貪花風雨偏來往
半是齋娘半浪婆

幾番邀笛坐胡床消受青奴一味涼擬奏尊官乞恩假
河陽潘令種花忙

都知錄事局全差且向東京記夢華一語殷勤勸楊柳
惜春人去莫飛花

宿陶紅樓隱寺題壁

層樓高閣倚雲開舊識禪堂老辨才寺爲迎官將徑掃
我因呈佛帶詩來馱經白馬西廊繫照壁紅樓
一局殘棋一窗月招僧同賭菊花杯

逸月再至見江孝廉和章喜登前韵

蕭寺重遊笑口開多情江令費詩才偶將鴻爪留痕在
不料牙琴渡海來殿角燈孤僧影小江山秋早磬聲催
鬼哭燕麥應憐我前度劉郎又舉杯

冬月又至則和章盈壁矣再登前韵

野花開盡筆花開小雅才兼大雅才三度絃歌傾耳聽
一村珠玉上墻來僧知避俗門多閉人不能吟鳥亦催
我願大行鄉飲禮徧酬詞客一金杯

雨過

雨過罷焚香梅花落印床原非棲枳棘爭敢薄淮陽有
志爲民母無心學吏商只嫌空鹿鹿方寸舊都荒

輓施曼郎有序

蕪湖秀才施曼郎有衛玠之稱工詩愛潔讀余
春柳詩屢寄聲道意病不果來死後其友秦澗
泉索詩以弔

江南才子淚如絲來說瓊林損一枝金谷未窺潘岳貌

秋墳已唱鮑家詩
梅花愛好春風去
黃卷無靈白骨知
惆悵山松歌薤露
不同歡笑只同悲

冬日往揚州阻風永濟寺贈默默上人

入門修竹倚雲栽
小脫朝衫坐綠苔
石幕勢吞高殿起
江帆影射畫堂開
阻風莫悵前程緩
失路方能福地來
喜對高僧頭似雪
月明同上講經臺

揚州回泊燕子磯登亭望雪

來回剛十日船到正江晴
望雪還登嶺
貪閒未入城
寒花侵月魄
凍雨入春聲
且傍荒灘宿
孤鴻替打更
不到千峯上
安知萬象空
高山頭既白
殘臘歲將終
絕頂荒亭雪
孤身四面風
憑闌心忽動
月起大江中

漂母祠

千金一飯尋常事不肯模糊是此心
我受人恩曾報否荒祠一過一沾襟

感懷四首

江城宿霧曉陰陰偷得閒身病屢侵
萬古少回唯月色四時多恨是春心
少年好景風前憶花底斜陽雨後尋
二十詞臣三十吏名場容易感升沉

三春何處不烟沙兩眼能看幾片花
愁對青雲生白髮且將紅粉當丹砂
一官奔走空皮骨萬事艱難閱歲華
惆悵輸他貴公子五更沉醉阿儂家

黃鸝遙對酒杯歌似報江南又綠波
照我忽驚新月白

回頭唯覺古人多
花無菊婢秋將近
面有髭奴老漸磨
九十日春春不少
可憐人自要蹉跎

斷無名士不蕭颯
騎馬年年上板橋
笛裏江山懷故國
酒邊風雨送春潮
花開官署枝枝倦
鶯過清明日日嬌
安得新蒲爲彩筆
儘書心事一條條

迎春

迎春莫怪春難見
好處從來過後知
隔歲梅花報芳信
倚門楊柳望歸期
無邊暖漏聲聲促
有脚青旗步步移
料得東皇非長吏
不應嫌我出郊遲

送春

驪歌樹上子規聲
報道東皇出郡城
久住似嫌芳草老

輕裝不帶落花行從今時節都無味留贈雲山尚有情
早識相逢遽相別當初翻悔下車迎

咏史

武帝英雄主叱咤動八荒旌旗十八萬遺恥雪高皇馬
來大宛國頭懸南越王秋風歌一曲援筆能文章汲黯
老匹夫山東一木強作令便爲恥積薪語更剛動請先
斬臣批鱗相抵當當時竟殺汝如鼠投沸湯不冠而見
之於帝更何傷帝終不出此容黯老淮陽吾嘗掩書卷
此處長思量

儒者桓君山彈琴天子側偶見宋公來慚顏深踉蹌君
王愛泛聲一彈奚足貴亡何爭識書叩頭竟流血所論

豈不臧天子惡其直母乃意狎之將威脅琴客始悟宋
大夫自重立臣則

公孫帝西蜀馬援來叩門爲設舊交位不忘主與賓過
車必磬折贈衣周寒溫援乃退而笑子陽妄自尊後世
有蕭韶且忘斷袖恩士邇托心期終招顏竣嗔人貴如
輪回都忘前世因長拜井底蛙公然古之人

子房非正士可傳惟一樵自見黃石公陰險靡不爲爲
韓非其心滅韓皆其計不肯立六國韓宗遂隕地野雉
幸辟陽夫妻義已絕立賢不立長殷周有成迹胡爲召
四皓爲之張羽翼老人見厚幣來如飛鳥捷龍準木強
人傷哉爲所劫長陵骨未寒殺子及其妾北門奪軍時

四皓骨已朽借使木未拱能安劉氏否報韓旣不成報
漢復何有所以子辟疆竟請諸呂王誰能爲此謀貽謀
自子房

東漢恥機權君子多徑徑悲哉陳與竇謀踈功不成其
時涼州反有人頌孝經意欲口打賊賊聞笑不勝雖無
補國家尚未遠人情一變至南宋佛行而儒名希哲學
主靜人死不聞聲魏公敗符離自夸心學精殺人三十
萬於心不曾驚似此稱理學何處托生靈嗚呼孔與孟
九泉涕沾纓

地道本無成女子從夫多姐已賜周公螽斯或可歌高
頗何么麼掩面學太公可憐青溪柵天桃啼春風狎客

既已赦美人胡獨誅母乃拒晉王逢迎獨孤歟不格君
心非宣華卽麗華終日對阿雲聞聲時滿家

臺城懷古二十四韵

五代干戈際蕭梁最不同秀才成帝業名士有英雄武
自騎兵擅文能金海通雍州西伯起白下永明終勸進
書隨例臨軒道獨隆瘡痍扶士女禮樂薦蒼穹口勅疏
經義腰圍損聖躬新聲十篇雅宮體一家風妖夢中原
入禪心玉座空嚴關矜鐵牡茆矢喪銀童少海光先掩
牟珠照忽窮長戈擗魏闕短腳犯重瞳豈忘沉溪竹偏
頒鍛鐵工傾葵陽獻土射日早彎弓婚僞求王謝繼真
縛老公江聲播戰鼓文物變沙蟲佛看君王餓花迎野

獸紅天威雖鎮定日角已疲癯主父無殘轂橋山有殯
宮捨身歸小豎殘局泣湘東法會斜陽外臺城衰草中
紙鷲迷信息棟樹滅青葱松影蒼崖古經聲杜宇悵唐
朝八丞相疑是報神功

董賢玉印歌

董侯夜醉麒麟殿漢王傳璽不傳印璽墜千年印獨存
傳觀猶帶桃花暈雙螭戍削陰文裂衛將軍董字堪識
想見郎官美麗時人面玉顏如一色郎官傳涕殿上行
顧盼能使椒風清高皇天下一笑與乃祖轉愧銅山輕
並后匹嫡一身兼三十六宮難爲情大賢居位美如許
孔光俯伏單于舞莫道和柔侍禁中亦頗知賢薦何武

一朝龍去鼎湖天頓首東廂狀可憐熏香傅粉人歸矣
露眼嘶聲賊儼然傳呼收印印早交委命豈待金吾刀
絕勝漢家老寡婦兩手握璽徒忉忉漢朝家法良艸艸
外戚橫行母后老不容舊寵戲金丸翻許新皇鑄剛卯
摩君玉璽不勝情憐君福過使災生當時用印誅賊莽
未必書傳佞倖名

題嚴子陵像

一領羊裘水氣寒自來自去白雲灘教陪天子同眠易
要改狂奴舊態難星宿張皇乾象動君臣彼此故人看
千秋欲解還山意只問江頭老釣竿

古銀杏爲火所焚

半夜木鳴天忽曙空山無人火在樹槎枒散作金黃雪
九天灰落烟紛紛黑風迸裂空心血枝枝葉葉飛晴雪
孤根一氣共死生倒燒直下三千尺上焚碧落星辰散
下熏無極黃泉熱天地焦枯會有時人力難施空歎息
憶昔當年種六朝曾同春薦佐含桃摩訶嬪御青絲絡
披拂將軍白玉緜亡何歲月如流電到眼齊梁人不見
幹排元氣更千年獨立江風當一面人間用材不用長
八尺九尺皆棟梁敗樗鉛刀易斷削白檀上手多觸傷
爾形醜強撐宇宙自合棄置來僧房雲雷坎壈遲變化
魂魄光明怒太陽一朝炫耀脫骨去勝入窻下當柴桑
啞啞烏鵲休憺神巢焚庭傾理所存君不見老僧躑躅

樹下悲遮雲護日今爲誰

丈洲

身非鳬雁水爲家日日輕蓬傍淺沙
蘆荻也知官吏到隨風吹送滿船花

水國灘荒頃刻生暫時弓尺欠分明
長官作奏須珍重賦入司農鐵鑄成

舟中畏風

鎮日舟中眼倦開雪花脉脉上輕苔
東窗關後西窗啓猶喜風無兩面來

晚坐

晚坐碧波上飄然白練褰月高沙鳥語
烟盡水天分洲

荻響成雨漁燈紅入熏更深尤可喜官鼓斷知聞

閒遣

瘦脚白翎老鷺鷥對人飛入梅花枝大江浮天月皎皎
小舟繫樹風絲絲開牕好在有山處上馬正逢無雨時
野行十日幽趣熟胥吏學官偷咏詩

洲上寄同官許南臺

時亦有丈洲之役

雙驅鎮日白門東芳草催人上短篷一夜江雲如墨色
知君同在浪花中

好詩難與官同作新俸常愁鶴要分此日烟檣沙鳥外
吟聲過盡楚天雲

莫把江租增冊上恐教柴價長城中東南民力今何似

不進盈餘是聖衷

盈盈一水路悠悠君在南洲我北洲可有新詩來作答
只題花葉付中流

嚴助

嚴助當年上大夫張湯小吏沒階趨今朝湯貴看嚴拜
勉強人前手一扶

哭鄧文端公

朔風寒雨九衢昏神化丹青失重臣薄海盡傳遺疏稿
不才曾是受知人魂依大祿歸清廟星冷長河換早春
十載回天兼捧日詔書哀悼莫嫌頻

當年遭際遇先皇曠古恩榮話最長如朕親臨朝出

塞爲卿眠食夜焚香訐謨語密青蒲煖顧命身孤玉几
涼怎怪報恩心力盡旁人聽也泪沾裳

魏公風節晚香深病革頻邀玉輦臨五岳祈年明

主意九原薦士老臣心邊疆功過青天在改土歸流將
事由公始

相榮華碧水沉他日近郊三百戶看人編作宰官箴

宮門扶杖立雲端嘆息才人向百官我已江南逐升斗

公偏東閣費盤餐華堂下拜千年別綠野招魂一水寒

從此青琴愁獨抱天涯白雪向誰彈

公賜餞
小紅園

偶見

柳絮風吹上樹枝桃花風送落清池
升沉好像春風意及問春風風不知

王孟亭飲別花軒以儿上漢壁分韵得花字

一雙拱璧來誰家
淒淒古血生陰花
無心傲世去圭角
有光照人如雲霞
匹夫手冷白玉墮
公子春歸明月斜
惆悵漢庭好皮幣
十三陵寢空烟沙

奏擢高郵牧部議不果

青鳥含來鶴料符
王喬未許脫雙鳬
謫仙自愛稱郎好
不願銜書下大夫

乾隆丁巳余落魄長安金陵人田古農見而奇之
哀其飢渴沽酒爲勞未十年余宰金陵古農已爲
異物求其子孫以詩告墓

欲報長安一飯恩
破牆流落小兒孫
難忘往日窮途淚

不洗青衫舊酒痕
萍水再逢風不偶
山河如夢客消魂
重泉此際應知我
玉笛親吹到墓門

哭侯夷門

天心最仁厚
往往薄騷人
不朽千年筆
難延一命身
題襟追弱冠
攬轡共江濱
高咏招魂些
英華秋復春

因問三秋到
歌章滿壁殘
典型還自在
風調向誰看
壯歲死生速
奇才科第難
高山流水曲
寂寞九原顛

客死阜橋地
梁鴻好遠遊
百年千里外
一笑五更頭
大齋文章在
微官宰相流
知君天間熟
醉寫玉皇樓

萬丈天台路
何年白骨歸
老妻交印信
稚子典朝衣
黃葉秋江冷
青蠅中客稀
詩魂逐明月
應繞石梁飛

與熊滌齋先生夜話浦雲堂

每開前輩談風月似聽宮人說上皇君恨過時儂恨晚
一齊幽咽淚千行

哭莊觀察

諱亨陽福建人

平生不讀宋儒書見到先生信我癡二月春風淮海有
一枝著草孔陵無道高轉覺人情近星少方知月色孤
遙望銘旌徒洒淚招魂難覓九天巫

郊行

郊行便覺少風塵况復秋光景物新禾黍迷離胥吏影
米鹽瑣屑宰官身山中判事書花葉樹下停車聚野人
一路銅駝同石馬不知何代物橫陳

宿栖隱寺題壁

五年栖隱寺一過一題牆舊墨都陳迹新秋又晚涼壁
燈多背雨風草不留霜諸佛應余笑緣多是此床
四野氛何惡三春麥不收縱教勤撫字難免有飄流過
糴非荒政開倉是本謀欣聞輸楚粟早晚到江頭

初得隨園王孟亭沈補蘿商寶意載酒爲賀得園
字

野徑初聞僕從喧小倉溪上酒盈尊暫時邀主先爲客
異日將官易此園萊竹倚窗如有待青山入座總忘言
諸公莫笑柴桑圃剛稱淵明五柳門

考志書知閣基卽謝公墩李白悅謝家青山欲終

焉而不果卽此處也

人好土亦好一墩屬謝公青蓮悅其景慨然思送終舒
王爭其名欲住愁雷同我領石城尹頗有晉人風偶寫
買山券竟與此墩逢疑是謝公靈相貽冥漠中地美懼
不稱景濶欣難窮將假烟巒勢重增亭臺功死則李白
姬仕乃安石恫蒼生如予何大笑東山東

上尹制府

風雲盪天地會合良不偶賤子區區名半世出公手公
勲塞海內公望端朝右在昔事先皇十年無寸醜劍
消青海戎筆醉天山酒兩度督江南歡走男若婦王道
周人情虛懷兼師友行路必行寬取材常取厚鳳鳴羣

鳥息月出星辰走心行天一周名極地九有大可鼓洪
鈞細不遺部婁經緯繞萬象寸衷豁白晝神力易刻劃
化工難雕鏤首蠻思握衣仇怨亦低首南面諸貂蟬問
有此人否憶昔明光宮賦詩獻 元后李邕罵輕薄劉
蕡幾不取公時眼如箕遺珠光獨剖未幾公西巡癡龍
遂不守謫向海天災荒村少雞狗公命移金陵聲名文
物數參軍非蠻語僕射如父母公餘商文章一月輒八
九使公常在朝我豈遂升斗我若官長安隨公反不久
恩始復恩終前定如壓紐屈指諸門生親炙輸袁某蕭
然不繫舟春春自花柳月落梧影霜雨灑碧池藕散髻
斜插簪飄然一詩史愛我如愛玉訓護驅蒙垢能養才

不才竟免口戕口欲酬國士知請鼓小人缶報公白玉
盤公家富且阜報公桃李花公門種成畝不如志聖賢
立身事不苟陸贄附鄴侯永垂不朽

上李觀察

諱永標

大道直如弦弱者不能到人人堯舜資伊誰窮堂奧大
勇惟先生立身何逋峭奉心爲嚴師粹然徵玉貌衣除
缺衽名饌斥邪蒿號過人不履影守津必據要有如秋
隼翔碧空發清嘯回薄萬象低日月供凌暴又如執雕
虎焦原肆騰蹕雄入九軍中孤身擎大纛窺其精進力
有境靡不造東南萬艘糧何足當公漕此職雖區區此
心亦稍稍委積察盈虛度支調息耗孤燭秉牙籌清風

除鶴料令嚴雀鼠逃弊絕胥吏弔酷嗜孟軻語寡欲絕
所好特艸孔融書薦禰夸年少公爲光明燭普天無不
照我爲螢末光有得亦相告祇憐手板忙主簿猶祭竈
妮妮學苛廉嚶嚶慕古調元象雖產菌革爰未變豹賴
公矜寵之辟咥時見詔龍門仰李膺月旦荷許邵時聞
張鏡談不敢顏彪叫微奏得賞音羣憂發孤笑今夕復
何夕霜葉紅于燒曹敘未騰輝月儀方減朧坐久肱敢
橫言合頭屢掉受公瓊瑤投未敢鹵莽報願同白首歸
羽翼聖人教

春日郊行

二月郊行最有情青山帶雨盡清明雜花香自空中至

野草根從舊處生小鳥啼烟催布穀老牛牽犢學春耕
勞勞官走江城北爭怪長條日送迎

秋夜與故人同宿作

余與同年曾南村黃筮潭收翰林爲令官江南
六年丁卯九月二公校秋闈畢來宿署中時南
村已遷廣德而余刺秦郵之信部議不果

一簾秋捲月光寒滿座燈痕當水看州郡久煩梁敬叔
弟兄重醉小長干文昌星動蘭臺聚舊雨談深桂燭殘
三十四人徵士頌幾回欲賦又闌珊

上下江分易別離春花同落不同飛頭銜卽席微微判
香案前生事事非數到科名吾輩老認來僮僕舊人稀

一州斗大談何易可奈停年格又違

尹公一奏許已三年

元旦後二日過牛首宿聚雲樓

新歲看山色官閒似我稀呼僧掃塵榻對佛解朝衣倦
鳥先人宿寒花學雪飛菩提龍樹下久坐竟忘歸
一樹梅含萼三更香滿天溪聲忙雨後峯影立燈前且
飽伊蒲饌同參玉板禪九州人事隔醒夢總悠然

次日阻雨題壁

雨如留客再題詩一夜潺湲夢覺時
搗帳冷雲當面墜隔花疎磬上樓遲
烟飄佛座諸天濕寒甚堯年老鶴知
我已無家似僧舍迎春何必與春期
初七日巳中候余迎春余眷屬已南歸矣

小住二十韻

小住姑蘇地羅敷託比隣三星明玉杵一顧識針神媿
媿東廂步盈盈半額顰豪犀蟬髻膩寶唾石華勻錦雨
淒通德金鋪鎖阿甄尋芳千蛺蝶索乳兩麒麟抵鵲明
珠怨隨鴉采鳳喚故雄名自在新特意初申孔雀深憐
尾楊花怕失身褰簾窺宋玉捧手上莊辛骨比香桃瘦
心同翅鹽春已徵惟廟夢甘受織蒲貧淚滴將離酒香
熏所贈巾袍爪失良匹火棗乞天姻鄭重連珠諾叮嚀
拾翠人紫泥封口穩黃蠟寄書頻闌苑雲無路支機石
有津鶴飛千里羽車轉九廻輪子貢三挑日丁娘十索
辰氤氲尋大使好夢只求真

婕妤怨

班姬入漢家容顏如朝霞不嫺歌舞彈清瑟不著褒衣
忘浣紗漢家天子愛傾城一顧蛾眉兩目成三星錦帳
金鑲召九殿風花鳳輦行妾心宛轉奉聖躬禁寒惜暖
啼春風妾執金鍼勤手爪燈牕繡出鴛央好方期白首
侍昭陽不道青蠅點素粧誰家母不三投杼何處天常
六月霜知道君心石不轉未免人疑謗妾短悔受恩波
碧海深翻嫌紈扇秋風緩長信宮中聖母居妾身長願
掃庭除紅顏榮落朝看鏡隔院笙歌夜校書夢見君王
淚滿巾黃金無力買長門只願至尊千萬歲趙家姊妹
永承恩

一卷

一卷青燈兩髭絲高吟子季別山詩圖官已類昇天佛
閱世誰憐折臂醫春夢五更初醒後南方三十早衰時
也知充隱非吾事偷得閒身老或遲

仁廟遭逢蘇子美漢文矜寵賈長沙兩人成就終如許
萬古風雲更可嗟雪裏豈無含翠艸春深原有未開花
笑摩腰帶從容記幾個金龜在酒家

心似彈棋局未平齋夫中有鄭康成八年縣譜談何易
一卷讒書若不清年命慣遭磨蝎累宦情都付子規聲
回頭尚剩桃花米且去江東作步兵

津陽門外賣車欄不盡凌烟興已闌都會自來迎送地

龔黃可是應酬官情知風利船何泊且喜花飛露未乾
試看永明春正好神仙早掛竹皮冠

挂冠

柳折青條花折枝挂冠偏與少年期香風太早春應惜
好日猶長起未遲出處敢云追往哲耕桑也是報明時
歸心濃後官箴少除却林泉總不思

曳紫拖青笑蛤魚年年戶限最難居未能閉閣常思過
且乞還山再讀書楊素無兒供灑掃潘安有母奉花輿
一灣春水千竿竹容得詩人住艸廬

樂府空歌臣馬良十年不召老淮陽籠中野鶴少高唳
籬外寒花多久香指膝自憐曾汝負飲泉終竟是誰狂

愛他嶺上孤雲意舍雨空歸作小涼

吹笛江頭換葛巾出山明月入山春陽城下下催科考
汲黯年年疾病身書外本無長戀物世間儘有耐官人
若邪溪水雲門寺久待爰綵日飲醇

次吉山菴壁上韻

有序

故人侯夷門死後兩月余遊吉山菴見壁上題
句瀨水陳秀才和之以侯遷官溧陽爲感蓋俱
在夷門未死時也嘻秀才以聚散興悲而余以
死生誌恨其情又當何如

惆悵茅菴隔歲遊蕭蕭雲物認清幽山中題壁人何在
江上孤桐樹又秋方擬故園尋宿草不期此處卽西州

浮生落葉年年恨寒月無情獨下樓

江行風雨

高灘敲木繫船廻萬里荒荒白浪開雨脚大於烏鵲陣
風聲狂似虎狼來沙崩水挾蘆花走吏散官招野鳥陪
三尺布帆行未得漫言人是濟川才

不寐

夢不分明醉不醒春風料峭我伶仃孤篷打遍蘆花岸
一夜江聲帶雨聽

許南臺席上咏三十六梅花研

玉皇昨夜蓬萊宴三十六宮春不見化作梅花下世間
一拳怪石開生面許公得之喜不勝終朝張飲招賓朋

澆花只須照一升頃刻寒香上管城

洲上寄南臺

冰斷水聲聞孤舟酒不醺風吹寒日瘦沙截大江分白
驚怕無語梅花淡似君相思心正切一雁下南雲

冬月送尹宮保入覲

十月霜風響玉珂尚書應詔走關河心如遊子冬溫
切事爲蒼生而奏多六出花隨鞭影動九重天聽履聲
過遙知吉甫趨朝日剛和彤廷瑞雪歌

暫拋簿領看烟霞題滿青山便到家高嶺早含初出口
古梅香重隔朝花賀循寵賜三公服黃鵠恩乘一丈車
不待河清公已笑前村知有好桑麻

廿載封疆依舊貧行囊只帶一家春
貢篚草草無方物薦表拳拳有善人
公論自多留鼎餽私心還望轉車塵
老臣耐得征途冷原是冰霜閱歷身

宿海會寺題壁

江城逢春日縣官愛下鄉處處花草生
時時春風香銅井診死人促我車馬忙
我時受卑濕兩足頗患瘡笑爲民父母
痛癢真親嘗出城九十里一宿無所將
晚投海會寺敗草鋪繩床青苔古殿冷
梅灰脫踈梁我與三尊佛彼此同燈光
遙遙粥鼓起齋餽紛回翔我時有所思
美人天一方吳下有欲臥愁不寐欲坐神轉傷
且磨紅絲硯塗僧白石牆上言陽春景下言遊子腸
純灰再丹

聖此字母消亡永留鴻爪跡異日紀行藏

送尹宮保移督廣州

台星移照五羊城頃刻慈雲萬里行自有謝安江左重
恐無嚴武雪山輕黃花香晚秋容淡紅葉霜乾驛路清
兩度南邦送生佛者番情勝往年情

百粵清風手護持越王臺上柳如絲調停犴性難馴處
珍重蠻烟乍到時莽莽江聲催髣髴荒荒海氣動旌旗
尚書病起應消渴剛好水盤進荔枝

觀察番禺舊日恩廿年重接玉車墜風花轉眼非南國
屬吏從頭問故人世上本無常照月天邊還有再來春
平生聽說西湖好此去公才試畫輪

公以得過杭州西湖爲喜

唱徹新詩大小東臣心遙映佛桑紅鬱林石認雙旌色
合浦珠還一夜風玳瑁齋時民氣靜珊瑚網處士林空
輸他花裡羅浮蝶飛傍軍門得見公

多蒙青眼盼袁安薦表千行墨未乾依倚半生真我幸
挽回一命教公難豐城已掘光仍掩朽木重雕望正寬
此日成連琴忽斷萬層海水白波瀾

陽關一曲月西斜彈指何年侍絳紗生更難逢韓太尉
知而不遇賈長沙宦途黑漲三春夢故國青山兩鬢華
幸有文書抽手版辭公容易到天涯

前詩書就紙猶未終憶已未廷試詩題因風想玉
珂枚賦得云聲疑來藥苑人似隔天河大司馬甘

公雖語涉不莊幾遭駁放公力爭良久始得入
追念微名所自餘感迭增續書一首

宜春小殿鳳樓東學賦清平調未工琴獻已成焦尾斷
風高重轉落花紅追思往事疑天上再說前期似夢中
唱到劉歆知已賦海波易盡曲難終

古意

霍將軍年十八帶刀上殿穿羅襪綬儀冠上水精珠繡
綳從從承巷趨手挾金丸彈落日口含雞舌說兵書漢
家烽火交河北紛紛老將多飄沒不是深宮蹴踘人難
消天子憂邊色元戎首領出都門艣輶新裁穩稱身雙
瞳涼入天山雪一劍橫磨瀚海雲花門小箭試雕弓射

落天狼下碧空
甌脫塵沙如掃電
龍庭草木盡驚風
捷書夜向甘泉報
單于面縛臨洮道
胡婦從旁更有情
胭脂畫得將軍貌
策勲太廟好威儀
朱鷺青陽幾度吹
君王親解黃金甲
翁主爭調白玉卮
風雲色傍衣冠動
日月光從掌上移
閨中少婦曉霞粧
聽唱刀環喜欲狂
鐫金刻石歸青海
吹竹彈絲進洞房
爲郎手撲兜鍪土
一陣餘寒塞上霜
明朝有詔頒宮女
片片桃花能解語
半是宮粧半外粧
甲兵洗盡巫山雨

浴

浴罷憑欄立
高雲掩夕陽
不知何處雨
微覺此間涼

解組歸隨園

櫪馬負千鈞長鞭挾以走一旦放華山此身爲我有當年疏大夫棄官歸田祗餞送兩無言開懷但飲酒照見碧流中面目如前否

滿園都有山滿山都有書——位置定先生賦歸歟兒童送我行香烟滿路問我乃顧之笑浮名亦空虛祇喜無愧怍進退頗寬如仰視天地間飛鳥亦徐徐

又作六言三章

六載元嘉政滿五株楊柳花低田饒黃鵠舉矣陶潛歸去來兮

朱邑桐鄉待祀堯山員俶怡情要試官聲去後權爲此地蒼生

故土非忘西子諸袁本重南朝讀到傳名真隱先人手
似相招 袁淑著真隱傳

示送行吏民

我聞蕭嵩乞歸日正是明皇寵渥時道待陛下厭臣日
臣且懼罪何敢辭又聞韋公垂明訓年不必老須知機
常時組解作游戲青髭往采商山芝我今一紙乞歸養
吏民驚駭相攀追愛公留公公不可請問兩語公荅之
公之上游方倚重受寵不覺寧非癡公之年紀三十三
春行秋令何蕭衰我聞此言不能荅一詞但指蕭公韋
公是我師兩公隔我已千載每每行事長相思當今人
才車斗量三公九職交相治苟與一官人人辦非某不

可聞有誰登山臨水少年事果然衰老將焉歸
官人道早五更出夢吾嫌遲雲歸雲出亦偶爾
以雲不知猶恐汝曹昧此意布露所畜書一詩

寄雅撫軍

古臣扶皇極其道有兩宗大者治本源啓沃始君衷
水驅元象探珠出蛟宮從此鼓萬化一氣如春風其
任經畫禮樂兼兵農一事受調停一物多蘇融活國如
魏和救時如姚崇稽之文仲語不愧稱立功此言何所
得我得于明公我從蘇州來拜公瞻儀容公本 皇家
胃腰帶垂雙紅燒殘一寸燭所談殊未終上言陳堯禹
下言籌兵戎慷慨念東南米貴安所窮年年買如珠不

論歉與豐雖云戶口增開闢亦十重耳乃積貯策所謀
實未工古穀積閭閻今穀積倉中閭閻婦女樂倉中雀
鼠空糶者十之三糶時豐轉凶譬如身血脉節節須流
通約束阻抑之不免生疽癰其他財賦類參茶鹽鐵銅
轉輸于乾坤道皆與米同大哉明公言可以陳蒼穹方
今大江南民氣亦已壅 天子甚神聖將責賢者躬聞
公姓名來笑聲起兒童願公行所言事業垂豐隆豈無
爲之難古人重愚忠補救得尺寸雨露皆殷濃賤子引
疾去不獲親睍睍有如漢明妃臨別才相逢感激知已
意讀書東山東高堂白髮在歸心時忉忉猶爲一倉穀
新官多磨鍊欲飛身無翼欲步手無節白雲渺在天夢

見龍門桐桐高三百尺枝葉覆雕蟲此蟲無所求願歸
采芙蓉江湖皮骨老再來佐夔龍

寄辰方伯

諱垣

櫪馬不受羈空山耽孤往難忘伯樂顧中夜發長想當
今求賢 詔纁組不停訪惟有夫子來 天心獨上仰
胸涵水鏡明氣肅烟霄爽牙籌策輓輪龜刀定鳧鎚我
初謁崇階問名獲曲獎側耳詢治理傾衿納忠讜偏于
沒階趨許其伸骭懽時逢老母疾飢童欲歸懷公意大
躊躇留書凡三上自慚鉛刀藏尚邀神劍賞更悲弱艸
去不受春風養惻惻鳥辭懷依依兒脫襁事已箭離弦
情猶珠墜掌于我良悠悠而公獨怏怏同道自有朋君

子原非黨殘臘走杭州宛轉謝西丈公令郎君見玉質
何開朗能爲孽窠書歐褚工摹倣德盛一家榮政和萬
民享舊尹還白門方春理雙槩爲善哭子皮登龍感任
昉古劍雙龍掘孤琴七絃響欲報知己恩橫術何廣廣
莊容可少司馬督學金陵招飲公廨卽席有贈

蠟燭當筵似有情照人舊雨倍分明雲泥脉脉公然定
鬚髮巋巋相對生滿席風寒秋有影一天霜重雁無聲
劇談只覺懷難盡已是歸來月二更

韋綬有序

偶閱談薈載唐宋詞臣恩幸事疑其不實後又
見他書載蜀主王建過禮翰林人尤之蜀主曰

我昔直禁軍見唐天子待翰林之厚雖朋友亦
如也我不過萬分之一耳審是則談會所言容
或有之矣爲紀以詩

天子臨門酒未消西清酣寢月輪高醒來陡覺春寒洶
身上韋妃蜀纈袍

王珪

有詔傳宣到玉堂翰林踏月見君王宮娥磨就三升墨
一朵珠花字一行

宋祁

聞呼小宋是宮鴉天賜蓬山一片花人不風流空富貴
兩行紅燭狀元家

小倉山房詩集卷六

巳巳

錢唐袁枚子才

歸家卽事

初四出官署二十整行裝三十抵烏鎮初一日入錢塘錢塘到家近心急路轉長離鄉忘鄉音入耳翻俯張闔者問名姓小犬吠離旁主人不復顧直趨上中堂阿姊扶阿父老妻扶阿娘衆面一齊向雜語聲滿房阿母向我言爲見道家常我老妻疾病且喜無所妨不如汝之父秋膳口頗強自汝出門後諸親如水涼三妹抱瑤瑟悔嫁東家王四妹壻遠遊李蘭尸祭忙汝嬌自粵歸祀竈無黃羊舅家風淒淒滿屋堆靈床行汝各甘苦便汝相

扶將阿母言且行手自羅酒漿阿公爲我言望兒穿眼
睚昨得一口信道汝頗周詳初四出官署二十整行裝
三十抵烏鎮初一入錢唐新官初攝篆米穀猶在倉三
鬴與四鬴廩人未收量汝今雖歸家何能長居鄉汝食
大官俸我得屋東廂汝仰視櫺棋千金寧低昂荷花三
十里蔭栢復沿塘金丸小木奴冉冉自垂黃老人手所
梳待兒歸來嘗我將行赴園有人牽衣裳一妾抱女至
牙牙拜爺旁作怒告訴爺索乳頗強梁一妾作低語外
婦宿庚桑君母忘營蒯專心戀姬姜老妻笑啞啞打開
雙青箱謂當獲金珠而乃空文章阿母欲我息吹去蠟
燭光明日大母墳長跪奠被觴孫兒十八歲懷抱猶在

床今兒得官歸古墓生白楊嗚呼蒼天恨此恨何時忘
後日走西湖帶雨觀湯湯我行周四嶽畢竟此無雙悠
悠笑語過忽忽燈節忙此身不自持呼僕買舟航阿母
留兒子一日如千場勸兒加餐飯爲兒備餼糧家園笋
似玉手烘加餠糖春茶四十挺片片梅花香阿父不受
拜但指塢邊霜妻妾無所言含淚不成粧惟問幾時歸
君歸我可望阿姊出簾拜甥兒要同行叔母亦唧唧阿
昂交與兄兩郎俱年少初生別離腸親朋來一送軟語
都未遑蕭蕭北門關行李搖夕陽慈烏哺復去脊令聚
復翔鴛鴦折荷葉織女望河梁浮雲爲鬱結驪駒爲徬
徨人生天地間哀樂殊未央

正月十七夜

滿牕月色滿池烟
千點寒鴉一客眠
夢裏忽驚蝴蝶影
梅花飛過枕函邊

寄程魚門

淮南有桂樹秋花含春姿
生長斥鹵地馨香交始知
翩一黃鳥歲歲長相思
稱梁不自謀經營托所司
相知日以深相看日以希
此樹不落葉此鳥無卑栖
所以歲寒時寸心兩不移

去年秋風發拾得雲中書
書中三千字字字珊瑚珠
珊瑚七尺長朝夕生奇光
旁人勸我售佳人勸我藏
豈不惜顏色恐爲物所傷
感激佳人意涕泣沾衣裳

西江魏公子海上彈詩琴可惜太通脫揮盡千黃金殘
臘渡空江賤子病扶床程生亦復至病者喜欲狂呼兒
羅酒饌大笑傾千觴我病君莫慮病欲隨官去將攬君
子衣告君罷官趣梅花今又開君子在何處

阿兄將出山阿弟守故紙弟也爲科名兄也志千里兄
弟各有心蛟龍分路起其旁有鄙人長笑不能止觀我
十年來此味如斯矣賈生王佐才年少拖金紫禮樂與
明堂揮霍滿牙齒遭遇漢文君慟哭長沙水破鏡飛上
天不能照妻子寶劍變犁鉏家家得耘耔

綿莊窮六經賢者識其大紛綸并大春意聖沈不害跪
起何舒遲遺蛇其冠帶太矜舒雁容致招蜀犬怪忽受

虛弦驚無故出居外六石青蠅矢竟爲僕生戒君書致
諄諄居間求郭解我將膺合權騎驛使愉快儒林與文
苑古無鴻溝界一史偶作俑千秋竟分派我雖韓柳才
敢不殷陸愛我雖孔明賢敢不簡雍拜爲渠思者三子
毋言之可

哀樂不能已然後考鼓鐘性情得其真歌詩乃雍雍後
儒失所傳淫淫鳴秋蟲昨吟吾子詩音與漢魏同宮商
一再彈流水滿絲桐願子崇景光大雅扶國風三微統
未絕羣雅道方隆結交得古人空山誓始終

君看白雲飛知我此間好但恨巢與由此身不肯老今
年陰雨多江上秋來早且喜得秋涼又恐傷芳草芳

日以傷故人日以少臨風寄遠章落葉滿懷抱

宿蘇州蔣氏復園題贈主人

白門新挂竹皮冠爲愛梅花不作官今日名園偏晚到
萬株香雪點燈看

爲儼安放竹床邊剛在花明柳暗天侵曉主人尋不見
早同鷗鳥立寒烟

春雨瀟瀟滴滿階春宵夢短眼頻開銀燈紅淡竹牕響
半夜月明仙鶴來

縹帶橫陳萬卷餘鄉媛小犬鎮相於人生只合君家住
借得青山又借書

碧檻紅闌屈曲成海棠含雨近清明半池雪霽水微綠

坐看野塘春草生

亭孤容易夕陽斜
寶塔金泥射落霞
每到細烟生水上
晚鳥啼出隔牆花

青山顏色主人恩
相別能教不斷魂
水竹風情花世界
恰曾消受幾黃昏

四月四日龔愚溪移尊隨園得招字

柴門那得有人敲
隱者除非酒可招
山裏送春剛四夕
柳邊垂綠正千條
空堂棋罷微聞雨
遠樹鶯啼半入簫
君若再來休問日
今年無刻不逍遙

後五日談沈兩門生來置酒得種字

殘春孤花危新晴
遊人勇送酒遇劉宏
分題得江穗字

茲米陽節登彼綠雲蘿連舟朝淺揭雲壘夜深捧蝶行
小草搖日落羣霞擁簾影只三人鳥聲恰萬種呼值散
金燈月華如水湧

十九日梅坡招孟亭南臺再集得觀字

有酒我不飲無酒我不歡不如招酒人痛飲使我觀王
郎知此意清晨擔杯盤諸客從而後來泛杯湖船幽花
隨春開好香隨風傳有月便歸去無雨且盤桓問我飲
不飲存杯聽自然所以主人翁自號稱隨園

讀書二首

掩卷吾亦足開卷吾乃憂卷長白日短如蟻觀山邱秉
燭達夜旦讀十記一不更愁千載後書多將何休吾欲

爲神仙向天乞春秋不願玉液餐不願蓬萊遊人間有
字處讀盡吾無求

我道古人文宜讀不宜做讀則將彼來做乃以我往面
異斯爲人心異斯爲文橫空一赤幟始足張吾軍

隨園雜興

官非與生俱長乃遊王路此味旣已嘗可以反吾素看
花人欲歸何必待春暮白雲遊空天來去亦無故
喜怒不緣事偶然心所生升沉亦非命偶然遇所成讀
書無所得放卷起復行能到竹林下自有春水聲
客敲柴門響主人在夢中驚起索布襪遺失草堂東夜
亦無所想夢見竹樹長客若遊我園赤腳送君往

造屋不嫌少開池不嫌多屋少不遮山池多不妨荷
魚長一尺白日跳清波知我愛荷花未敢張網羅

花自帶春來春不帶花去雲自共水流水不留雲住我
欲問其故無人有高樹樹下閒思量春與雲歸處

耳目口鼻心偶然爲我有有而拘繫之此物爲誰守心
爲身之主身乃心之友以主奉嘉賓陶然飲一斗

經史與子集分爲書四支亭軒與樓閣四處安置之各
放硯一具各安筆數枝早起澣沐後隨吾足所宜周流
於其間陶然十二時

聞我書聲息四面老農來壯者負犁鋤衰者穿屣鞋嬉
者戴蓬累勞者擔薪柴邀我大樹下懷抱一齊開今年

苦風雨良苗猶未栽聞公讀書聲毋乃舉茂才愛其性
真誠發言如嬰孩各贈一杯酒縱橫卧莓苔

好鳥不知名翩然四山至村人來我前往往有酒氣我
有舊門生送酒月三四花下開酒觴觴畢作棋戲一杯
醉扶床一局敗塗地蕭蕭新竹枝似有扶我意扶起謝
東山一笑吾猶未

君莫笑樓高樓高固亦好君來十里外我已見了了君
來莫乘車車聲驚我鳥君來莫騎馬馬口食我草君來
毋清晨山人怕起早君來毋日暮日暮百花老

當年隨大夫對山初作屋亭榭招雲烟杯觴明華燭父
老爲我言此公殊不俗拱手竟貽誰何由知是僕迢迢

年重來理花竹隨之時義大園名不改卜以我人
日舊尋公往日樂逝者如斯夫古今同一局我後更何
人問山山不告

送許南臺入都

鍾山有良鳥羽翼無孤翔金陵有同官臨去亦雙雙同
君官石城同君家古杭兩同何足喜所喜同心腸君心
多落寞我心多疎狂大家抱寸心皎如明月光相聚不
覺樂相離各自傷彈指四年中歲月同奔忙江頭迎大
官舟楫相扶將朔望府中趨車馬偕煌煌我愛臨汝節
君亦盛衣裳我求鍾繇珉君亦佩琳琅我歌郢中詞君
亦能文章渠眉大駟圭爭買盛金箱隨園十六韻句句

能鏗鏘我來多日午君來多夕陽與夫不待命亦遽升
高堂皂隸知坐久鼾聲官署旁家僮如兒女紛紛羅酒
漿梨園子弟來歌舞邯鄲倡紅箋親戒速擊鼓椎肥羊
後湖七八月載酒水中央使我兩襟袖至今荷花香阿
時貌如玉君家六歲郎倭髻出拜我喚我妻作娘阿娘
雖南歸愛兒不能忘今春我歸家娘問兒可長前年才
扶膝今年當扶床從前贈文葆未必還收藏今將寄錦
袍稱身須裁量請君記此情此情豈官場爲君歌此曲
此曲尤悲涼自我乞病歸君興竟頽唐起視世間事亦
復歌迷陽吏部文書來工部催君行鼓吹吹君車明駝
馱君裝我初心歡喜須臾又慘傷前此二馬逐目落已

三商後此相逢期海水真茫茫今夕置斗酒黃鸝鳴枯
楊欲行且未行強君進一觴願得兩弟兄延齡各千霜
天南地北時德音永相望

與家弟香亭陸甥豫庭居隨園做昌黎符讀書城
南詩作二首勸其所學

示香亭

我昔見弟時弟才離襁褓弟今見我時弟年如我小兄
爲西湖魚弟爲粵西鳥相去萬里餘相別十年杳兄弟
記從前大家難了了我叔滯異鄉半生伴猺獠娶妻得
繆家家口忽繚繞黃籍忘故鄉白頭尤懊惱傷哉就木
年六十不爲老上有慈嬀悲下有諸孤藐我弟難自存

全家歸悄悄木葉自返根海水多入島不恨歸太忙但
恨歸不早我父喜弟歸焚香告祖考我母喜弟歸傾盤
堆梨棗我妻喜弟歸公然學作嫂消息傳賓朋聚觀集
隣媼弟性既溫 and 弟顏亦美好執筆學爲文頗亦知頭
腦我家雖式微氏族非小艸高祖愧伯公烏臺稱矯矯
傳家無笏囊所存衲襖此事汝未聞此語汝宜聽勉
旃光前徽典籍窮搜討辭浮理易疎境曲心能造阿兄
旣辭官分俸時愧少常恐嬾在家菽水未必飽欲慰白
髮親須立青雲表矧茲讀書地幽趣頗飄渺楊柳何依
依竹竿亦嫋嫋對景生天機隨心發匠巧阿兄區區必
焚香向天禱

示豫庭

我攜甥出門我姊向我拜我姊胡拜爲托汝情無奈汝
食不愁飢汝衣不愁敗所愁汝讀書十年不通泰爾學
舅可教爾文舅莫代文字爾求佳舅如負姊債爾父名
秀才中年因疾療初作淳于贅繼乃出居外我姊事其
夫夜不解衣帶藥餌兼櫛櫛裙釵無遺賣汝父氣奄奄
呼姊申遺誠我有兩孤兒麻者居其大屬猶才扶床屬
兔未能話諒難自成立惟爾弟是賴我姊聞此言肝腸
摧以壞麻衣白若霜抱汝來廳解我時遊京師厨竈苦
湫隘人窮恩易衰米貴親誰丐我姊燈熒熒手爪自凋
憊對汝父遺像悲泣聲流喝未幾我作令家計稍可耐

爲汝延經師望汝早釋菜忽忽十九年冠禮行將屆汝
熟一寸書我心何愉快汝隨羣兒戲我齒時噤齟教汝
如教兒親親竟難殺記汝喚阿登幼時殊可愛酷似劉
牢之雙瞳良足怪長乃質稍鈍學力慎毋懈精衛填海
波愚公移泰岱老夫慣諄諄君子應夫夫人生尺寸名
會須及親在況汝白髮親春暉豈可再

赴淮作渡江吟四首

一聲篙入江萬象化爲水喜無塵埃侵但把明月
琴咏先王浩浩一千里前望去者船虛無不見底後
來者船次第出烟裏茫茫來去者俱爲風所使僕
其然吾行亦吾止當寒秋正清燈定潮不起舟行不

憂舟泊吾更喜夕陽不見人歌入蘆花矣

五更江上起落月金盤光青天虛無聲寒蓬微有霜
海同一魂大夢酣茫茫而我當此時萬感回中腸青雲
懷北闕白髮思高堂百年會有期行役殊未央瞻彼江
湖濶知我道路長聞此蟋蟀鳴能無遲暮傷北斗爲我
愁駐柄頽西荒元鳥爲我悲孤飛三兩行偃息再入戶
餘溫猶在床我身應我愛嘆息加衣裳

日落黃天蕩懷古思英雄南宋韓蘄王於此觀軍容金
兵南下時旌旗耀白虹韓王八千人扼之於江中紅顏
擊金鼓白浪生刀鋒坐見楚師燄六軍爲沙蟲要以三
大事兀術語已窮二聖有精魂頃刻慈寧宮惜哉少周

防烟火燒飛蓬遂使隻輪返恢復無全功韓公從此悟
萬事慎所終所以岳家死公竟如神龍策蹇西湖濱醉
倒東南峯舉手天地動放手烟雲空朝爲大將材暮作
漁樵翁

昔年尹宮保奏我牧秦郵吏部議阻之勲格相羈留我
今過此邦一望無田疇適逢黃水決赤子生魚頭使我
果牧此何以佐一籌慨念今黃河勢合淮汴流祇因資
轉漕約束爲疽疣人自奪水地水不與人仇河身日以
高河防日以周縱舒一朝患難免千年憂何不決使導
慨然棄數州損所治河費用爲徙民謀更置遞運倉改
小運糧舟水淺過船易敵淮事可休路寬趨海捷泛

病可瘳此語雖驚衆此理良或優安得陳明堂并告東
諸侯

江中看月作

江風送月海門東人到江心月正中萬里魚龍爭照影
一船雞犬欲騰空帆如雲氣吹將滅燈近銀河色不紅
如此宵征信奇絕三更三點水精宮

到淮遊程尊江晚甘園作

淮水能招隱江風送我來故人今夕會叢桂小山開出
拜兒孫大登盤棗栗堆洪崖肩一拍先要看蓬萊
小艇一篷孤家僮兩兩扶三山風漸引四面地全無高
樹涼冠帶斜陽煖酒壺水亭終日坐身欲化菰蘆

山罅響黃葉空林似有人摘花香滿手倚石露沾巾橋
斷能通客牆低好送春飛飛風外蜨與我鬪閒身

辟疆園自好恰稱主人翁圖畫芭蕉雪笙歌玉笛風張
燈千樹上開卷萬花中莫畏烟波濶青山護此躬

難

蕙江有家

舊墨題餐勝新詩別海棠黃金填大夢白髮老名場螢
影豆棚出山容屋角藏歸來重置酒夜坐話滄桑

不見程南陂比部投詩而歸

門外青青滿知君正避人科名兩淮重絲竹一生春過
路袁臨汝高眠鄭子真相思不相訪風葉滿前津

理桂

偶然兩眼明看見桂上蛛蛛絲如羅網蒙密窮林林佳
也花將開愛疑心不舒我心疾如仇不及呼園夫持斧
自搜剔桂意始潛蘇桂離我不遠種在書窗東我非以
桂者桂死猶凝望不見蟲爲災翻疑桂不材感激眼
事使我中心哀

芟竹

竹性不耐襍志在干青雲蒙茸依附者都非賢子孫腰
鎌爲芟除萬綠一齊立明月穿林來清風有路入始知
爲政者姑息本非好不見古干將殺人爲人寶

裴叔度宮詹祭禹陵過杭值余引疾歸里相見有

贈

六橋烟柳古杭州聽唱皇華躍紫騮望氣早知 天使
至抽身剛伴故人遊八年風雨燈前夢一片銀河笛裏
秋今日狂奴狂減未問公何事尚搖頭

中朝典禮重儒林許握牙璋作越吟太史茫茫窺禹穴
詩人步步入山陰雷門鐘鼓秋風急古殿龍蛇水氣深
倘過苧蘿花色好大夫莫動五湖心

櫻桃街北掖門東 帝里燈花幾度紅殘客有時腸九
轉新宮無譜曲三終高冠嶽嶽君全改滿面鬚鬚我忽
同賄記蓬山多少事輕雲已過月明中

宮簷珍重髻如絲曾有封章海內知才爲患多偏見少

官因遷早轉嫌遲君以編修遷班荆江館逢新雁折柳

天涯愛舊枝八表停雲公莫忘江東士遜有心期

贈朱端士先生

雍正壬子興眠歲我年十七君古稀試於有司僉中雋
得而復失同歎歎君如孔融忘已老爲羣拜紀甘如飴
我如鄭莊忘已少與大父行相攀追華堂稱觴衆賓集
命我製序夸文詞黃金爲泥書屏錦公然上坐傾瓊卮
家有女孫欲許字蹇修十輩縱橫馳事雖未果情足感
目光如月將人窺別來忽忽十九載我今解組重披幃
君喜走出笑不止滿頭插遍商山芝彼此握手認良久
同驚面目微參差蒼松在山屹不動看雲出去看雲歸
其時梅雨天潯新荷花深紅開滿池跪獻一尊知已酒

沾於君唇快我脾人生惟有貧時恩如熬戴石蠶含絲
喬公太牢徐君劍彼皆冥報非生貽難得高年還待我
一一出處親見之尚恨不能澤六合副君當初遠大期
姑且日拜丈人側如以芥子酬須彌

宿白土不寐

野店卧秋夜滿床如水生萬重心事集半點壁燈清欲
起慮驚衆無聊且數更一層窗紙白第五次雞鳴

寄香亭

歸鞭東指日斜曛記得山僧送出雲園在建康家在浙
心如瑞麥兩岐分

山頭一帶新栽竹我最關心夢見之喜汝昨宵家信到

爲言雨後活千枝

一家薪水尋常事莫損男兒瀟灑懷五月新絲三月穀
是儂草草已安排

卧醒寒梅紙帳中可曾佳句贈西風水亭秋月涼如雪
澹到書燈讀未終

遣懷

南山紫鳳凰光華耀流虹生餐玉山禾不食塵翳蟲垂
頭大海外有情烟霄中側聞唐堯廷后夔能敲鐘爛然
隨百獸來觀天子風所過千枳棘化爲雙梧桐忽然思
王母高飛扶桑東來時金翅耀去時風雲空百鳥向南
望萬古青濛濛

唐時有李叟行善夫妻偕朝供千夫膳幕設八關齋精
修二十年果然天門開我我金甲神稱天間所懷念汝
良苦志償汝所由來貴可金張位富可倚頓財憑汝擇
於斯天將爲安排叟乃再拜言均非臣所欲臣好在讀
書臣志在行樂堂前羅牙簽屋後多水竹掃地靜焚香
侍者顏如玉如此了一生雖死臣亦足金神拍手笑汝
乃大痴矣此是神仙福上界重無比不比富與貴擾擾
匆匆耳十洲三島仙賜者能有幾汝再修三生來請玉

皇旨

孫郎年十七手揮江東戈元裳披金甲豺狼俱盪磨百
姓震威名魂魄生驚波忽見美少年談笑春風和秋毫

不曾犯遠邇相謳歌
襲許迎天子頃刻取山河
人云太輕身王業終蹉跎
我道命存焉成敗難詆呵
漢高七十二中箭何其多
蕭王最持重亦復困滹沱
嘆息復嘆息英雄如天何

一日不再晨一過無留步
茫茫大化中萬類如風瘦
君直醉與癡但度母回顧
前顧春夢長後顧夕陽暮
未來或爲新已來卽爲故
我本青蓮花偶爲陰陽誤

步山下偶作

把卷閒行水竹居
孤花紅剩晚春餘
輕風剛值鈴殘處
替我吹翻一頁書

寄孟亭太守

大雅千年守江湖各有名是誰堪領袖屈指數先生灼
灼崔岐叔鏗鏗楊子行褰帷曾守郡剗草竟歸耕臨況
星將曙欽遲月盡更分攜甘谷水同酌碧雲英祖約談
何劇唐都道已成志書勞檢校史筆最縱橫潔可同靈
憲嚴堪比論衡體裁霞共駁書義鬼同爭古栢根盤大
流鶯口舌輕修江寧志被謗風懷歸酒德蘭藻入秋聲遣妾捐
家累編詩住石城花枝終日把碁子徹宵鳴官罷心纔
壯才難意始傾高文無敵手吾道有交情賤子歸鄉里
西風卷客旌孤琴彈漸少岐路夢頻驚八表停雲遠三
山落照明不知文社裏又進幾回觥

寒夜

寒夜讀書忘却眠錦衾香燼鑪無烟美人含怒奪燈去
問郎知是幾更天

好作古文苦無題目尋春輒不如意戲題一首

有筆無題每自嘆黃金何處買陽春論文頗似昇平將
娶妾常如下第人

三月二十四日偕門生王梅坡舍弟香亭陸錫豫
庭遊清涼山逢白下諸君子有修禊之事爲余置
別席於南窻醉後大書僧壁

王郎王郎隨我走樓復一樓看花柳謂是空山少人跡
忽逢衣冠七八九念我江城舊長官殷勤呼僮來送酒
此酒竟同天上雨隨風吹來飛入口一杯初酌風乍吹

兩杯再酌風吹久我弟我甥衣裳單面栗膚僵時縮肘
我生不飲今畏寒亦復捧杯不放手南窗大開殊有意
天送長江作酒斗梧桐葉葉招風旛綠竹枝枝掃雲帚
萬家閭閻浮碧空晚來一片烟光割嘆息人生會合緣
一酬一酢都非偶護世城中美儻天靈山會上前生友
我與諸公定有因敢說民瘼與民母只憐不速醉昏昏
忘恰主人姓某某且題僧壁志高情不管塗鴉寫龜醜
出門更笑問酒人明年此日還來否

偕香亭豫庭登永慶寺塔有作

一層兩層風力猛欲落不落三人影三人如蟻轉磨盤
塔高如天竟無頂身不登高眼不明江山歷歷似圍屏

何須僧借蒼龍杖天馬空行自一生